

FABLE XVIII.

LE Renard, deuisant avec le chat, se vançoit qu' il auoit tant de sortes de finesse qu' il auoit vne pleine beffaise de tromperies, A quoy le Chat respondit, qu' il n' auoit qu' vne seule subtilité, mais il tenoit bien asseuré; Et parlant familièrement, comme ils estoient sur ce discours, ils ouyrent aboyer des chiens qui s' en vinrent tout droit à eux; Alors le Chat monta viftement sur vn arbre qui estoit prochain, Ce que le Renard ne pouuant faire, il fut à l' instant enuironné d' vne multitude des chiens qui le prirent.

Le Sens M O R A L.

PAR cette Fable nous sommes aduises que la naïfue prudence est plus pure en toutes choses qu' vne Conduite pleine d' artifices, et de captieuses subtilitez; Ce qui sera mal aisé à persuader Vulgaire qui admire extraordinairement les finesse, et reputé bien heureux ceux qui en sçauent abondamment inventer, Mais ces autres, qui sont véritablement sages et genereux, se viennent au dessus de cette methode, et mettant la vraye adresse en vne discrete sincerité, en vsent accortement, et y conuient tout le monde à leur Exemple; Or que chemin là soit le plus vertueux, c' est vne chose si manifeste qu' elle n' a besoin de preuue, ny d' Experience; Il faut seulement sçauoir qu' il est le plus asseuré, et que les Ruses ne font qu' auancer la Ruine de leur Autheur, si ce n' est d' auanture quand il est question de s' opposer aux pieges d' vn Ennemy, et de chercher son salut dans la contre-finesse, Car comme vn chemin couuert de Brossailes, et de Buiffons est à bon droit plus suspect au voyageur, qu' vne voye toute plaine et vnue, ainsi vn Procédé, plein d' embusches traistres et dangereuses, est incomparablement plus à craindre qu' vne suite des actions vertueuses. La principale Raison est tiré de la multiplicité; Car à fouiller dans l' obscurité des affaires, il n' y a point d' homme si aueugle à qui l' on oppose vne finesse, qui ne trouue presque toujours le moyen de s' eschapper par vne autre. De plus, celui qui s' engage dans les Ruses, s' egare plus souuent dans vn Labyrinthe, tout de mesme, qu' on ne peut quitter le grand chemin pour broffer à trauers la Compagne parmy les haliens, et les espines sans se perdre, ou du moins sans s' éloigner du lieu ou l' on desire arriuer; Aussi est il fort mal aisé de discerner ce qui semble vray, d' avec ce qui l' est véritablement, et de reconnoistre vne realité parmy plusieurs apparences adroitement coloreés, sur tout, quand on est preoccupeé d' vne violente Inclination d' en venir à la pratique; Or s' egarer du chemin de la verité, c' est proprement, s' éloigner de la voye plus honneste, car à la pluspart, vn Conseil vaut beaucoup mieux moyennant qu' il soit vray, et d' efficace, que plusieurs machinations, et conseils friuoles. F A B.